



## Herremättli-Clique

Sujet 2013

### Zägg ewägg mit däm wiirbelloose Bebbi Schnägg

Am Margreethstich do hoggt e Schnägg  
und dä Schnägg dä wot nit ewägg.  
Unde am Hiigel sin d'Drämmli konsterniert,  
will dr diräggti Wääg, wo zem Bahnhoof fiehrt,  
vo de Schnäggli wird bloggiert.  
E Schnäggli doo, e Schnäggli deert,  
e Schnäggli wo nit numme s'Drämmli steert.

Drämmli, Drämmli, Drämmli, Drämmli,  
uff das Schnäggli wart i nämmli.

D'Blaanig stoggt, s'isch alles verhoggt,  
soo dass me sich als Biirger froggt:  
„Sin denn die alli nit ganz bache,  
das isch doch glatt zem Hyyle und zem Lache.  
Esoo-n-e Gschyss wääge däm Schnägg,  
im Margreethe-Hiigel-Drägg.“

Dräggli, Dräggli, Dräggli, Dräggli,  
in dir inne hoggt das Schnäggli.

S'stoot alles still, d'Zyt vergoot,  
d'Laimedaaler gseh bald root:  
„D'Bebbi, die bleede Sieche,  
die sin Schuld,  
wäär das e Linie noch Rieche,  
hätte si mit deene Schnägge nit soovvyl Geduld.“

Bebbi, Bebbi, Bebbi, Bebbi,  
das Brojäggt verschlepp i.

D'Bebbi maine: „ Das isch doch bleeds Gschwätz.  
Die Rampasse liige wiider vellig lätz.  
Die Schnägge sin uf dr roote Lischte,  
und gheere nit under e Drämmliplische.“

Schnäggli, Schnäggli, Schnäggli, Schnäggli,  
uff em Rugge hesch e Päggli.

Soo goot das eewigs häär und hii,  
de Schnäggli isch's wool derbyy.  
Dr Bund wott au nim lang druff waarte.  
S'gitt numme Stitz wenn si rächtzytig staarte.  
Drumm sott me, will me die Millioone haa,  
ändligg emool richtig draa.

Drämmli, Drämmli, Drämmli, Drämmli  
uff die Blaanig wart i nämmlü.

Doch woo aane mit em Schnäggl sim Drägg?  
Dä Drägg dä muess ewägg, ewägg, ewägg.....  
E g'aignete Blatz wird gsuecht,  
ain fir die Schnäggl gesunde,  
aber laider niene gfunde!  
So suecht me wyter und suecht und suecht.  
Derwyl wird im Laimedaal gschumpfe und gfluecht.

Vyyl schnäller als s'Drämmli isch s'Comité,  
so frieh hänn mir d'Blaggedde no nie gsee!  
Faare mir mit em Drämmli zu mir,  
oder zu Dir?  
Das isch em Schnäggl si Froog!

Schnägglü, Schnägglü, due nit frooge,  
und die baide Halbkanteen blooge.....

*Me bsuecht d'Waage- und Reggwysyte-Uusstellig bi dr Kasäärne  
und d' Laddärne-Uusstellig uff em Minschterplatz.  
Sy steen deert vom Määntig znacht bis am Mittwoch demoorge.*